

Guangjisi Minzcu Bau

ganhhau: CN45-0036 B.2019 Nd.8 Ng.28 liggaueq geijhah nienz ndwencaet ngeihbet

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3389期

Cungzcoj Si Yung Lahai Cungj Banhfap Doicaenh Cuengh Gun Song Saw Vah Gyauyuz Aeundaej Cingzci Ndei

Geij bi neix daeu, Cungzcoj Si gaenmaenx haiguh Cuengh Gun song saw vah gyauyuz, hauejcoengh dieg henzguk hwnjguh gij rengz lauxsae song saw vah siujyoz caeuq hwnjguh gij swyenz song saw vah gyauyuz, coicaenh minzcuz gyauyuz sonhag caetliengh daezsang caeuq swncienz vwnzva minzcuz vwnznoix aeundaej cingzci yienhda.

It dwg gyalai hwnjguh vwnzva ndawhag, cau ok gij heiqfaenh hag song saw vah. Guh daengz byaij hauej dou hagdangz couh roxnyinh daengz gij heiq Vahcuengh, doenggvaq dieg senhconz ndawhag, diegsuen hagsib, gvangjbo ndawhag daengz senhconz song saw vah sonhag, hawj ndawhag diegdie yawj ndaej raen Sawcuengh, dingq ndaej nyi Vahcuengh, ndaej yungh Vahcuengh. Lumjbaenz Denh-

dwngi Yen Dunghbingz Cin Cungsim Siujyoz ndawhag faenbied laeb miz mbaw biuj singmeh yinhmeh singdiuh Vahcuengh, gaisau Vahcuengh caeuq langhbaij vwnzva Bouxcuengh daengj. Linghvaih, lij laeb miz bozvuzgvanj iq, langhbaij gij minzsuz guhhong gvaq ndwenngoenz ciuhgeq Bouxcuengh, langhbaij le gij neihanz fungfouq caeuq yinxdaeuz daegbied vwnzva minzsuz Cungzcoj.

Ngeih dwg yawjnaek sonhag fuengsik, gyamaenh song saw vah sonhag cwngzgoj. Daengx si 8 aen hagdangz song saw vah sonhag "song loih vunqsik" (hagdangz sawqdiemj sonhag Cuengh Gun song saw vah) cungj hai miz aen ban sonhag song saw vah, it daengz ngeih nienzgaep moix aen singhgiz hwnj 2 dangz Sawcuengh, saedhengz Cuengh Gun song saw vah

song loih vunqsik saedniemh sonhag, ndeindei daezsang le minzcuz gyauyuz sonhag suijsingz. Doenggvaq gaenmaenx haiguh doxdax maegraiz Sawcuengh gyoepyaem, doxdax gangj gojgaeq Vahcuengh, ciengq Fwen-cuengh, doxdax yienj siujbinj Vahcuengh daengj hingzsi, daezsang le gij naengzlig caeuq yinxdaeuz hagsib hagseng dingq, gangj, doeg, raiz Sawcuengh Vahcuengh.

Sam dwg guh ndei hong gyauyenz song saw vah, daezsang song saw vah sonhag caetliengh. Cujciz haiguh lauxsae hwnj dangz guhyiengh "song saw vah", dangz goenghai daengj hozdung, hawj lauxsae song saw vah miz gij naengzlig yungh song saw vah hwnjdangz, hawj song saw vah gyauyuz sonhag caetliengh ndaej daezsang.

(Lungz Yenyinh)

Sanhgyangh: Duncuz Fungcingz Youz Hoengghwd

Ndwen 8 ngoenz 25, Sanhgyangh Duncuz Swciyen, minzcuz fungcingz youz cingq guh ndaej hoengghwd. Youq aen gyajseizhwnq neix, Sanhgyangh Duncuz Swciyen coux daeu Duncuz fungcingz youz hoengghwd, bouxhek gak dieg angqyangz yienjsouh minzcuz fungcingz.

Geij bi neix daeu, aen yienh neix gaemdawz aen seizgei ndei guekgya haidoeng gauhsuz dietloh caeuq gauhsuz goengloh gvaq ndaw gyaiq, cungfaen vatcimh minzcuz daegsaek guh hozdung lijyouz youqndwi, doidoengh vunzlai minzcuz vwnznoix dangdieg youq ranz ndaej cauhib laisou baenz miz. Ndaw doz dwg beixnuengx Duncuz aeu laeujhom hawj bouxhek gwn.

(Gung Siengzyouj/龚祥友)

Liujbwz Gih "Sam Aen Giethab" Haiguh Hong Soucomz Vah Minzcuz

Vih engq ndei guhsat hong soucomz gij swliu vahgangj 《Sawcomz Deihdoz Vah Guengjsae》 nangqdaengz Liujcouh Si Liujbwz Gih, gohyoz baujhoh caeuq hwngfat vah minzcuz vwnznoix, doidoengh gak minzcuz vwnzva doengzcae hoenghvuengh, Liujbwz Gih daj bineix ndwen 6 hainduj, giethab swncienz vwnzva minzcuz vwnznoix, senhconz minzcuz cwngcwz, cauhaeb minzcuz doxgiet cinbu, youq dieg guenleix haiguh hong soucomz gij swliu vahgangj.

Giethab swncienz vwnzva minzcuz vwnznoix. Liujbwz Gih baez neix soucomz Vahcuengh caeuq vahdeih-fueng Vahgun (Vahgeveilij, Vahmax-gai, Vahdujgyaij daengj) song loh vah. Moix loh vah cungj senj boux sugrox

gangj vah dangdieg, ciuq gij caizliuh saw loegyaem gvidingh haenx yungh vah minzcuz gangj loegyaem, dienj 《Mbawgienj Cam Diucaz Gij Cingz-gvang Vah Guengjsae》, caemhcai loegyaem vahdeihfueng Vahgun, vah minzcuz vwnznoix. Soucomz miz gojgaeq, vahyaem, doz daengj, hawj aen cang swyenz saw vah minzcuz vwnznoix ndaej gyalai, vih swncienz vwnzva vah minzcuz vwnznoix dwk roengz giekdaj.

Giethab senhconz minzcuz cwngcwz. Youq mwh 《Aen Diuzlaeh Hong Saw Vah Minzcuz Vunznoix Gvangjsih Bouxcuengh Swcigih》 (baihlaj heuhguh 《Diuzlaeh》) fatbuh ndaej hopbi, vunz guhhong gak cin youq mwh soucomz vahgangj doengzseiz, fucwz genjcaz

gaiqbaiz, aenyaenq, baizgeiqhauh daengj gak mbanj yungh Cuengh Gun song cungj saw raiz deng mbouj deng. Caemhcai senhconz gij yihi vah minzcuz vwnznoix hawj vunzlai minzcuz vwnznoix, doenggvaq senhconz, hawj daengx biengz lai roxyiuj 《Diuzlaeh》 caeuq gij cwngcwz minzcuz vwnznoix.

Giethab cauhaeb minzcuz doxgiet cinbu. Yungh cin(gaihaw) guh danvih, caz gak mbanj minzcuz gvanhaeh caeuq gvaq ndwenngoenz guhhong miz maz hojnanz, gaenxmaenx banhleix gij hongsaeh minzcuz hawj gyoengqde, gij cengnauh ngaekngeu nangqdaengz minzcuz yinhsu, yiemzgek ciuq faplwd gvidingh cawgleix, cietsaed baujcaeng gij gienzik habfap vunzlai minzcuz vwnznoix.

(Suh Yinh)

SIUSIK DINJ

● Geij bi neix daeu, Denzyangz Yen gyalai gij ligdoh vut gungz gunggeng, roengzrengz damqra gij vunqsik hwngfat canjnieb cunh gaep, mboujduenh guhndei nungzyez canjnieb gezgou, doenggvaq riuzcienj diegnamh, yungh "gungh-swh + hozcozse + ranz-gungzhoj" daengj vunqsik, haenqrengz hwngfat daegsaek canjnieb, mizyauq gyahung cunh cizdij ginghci, daiqdoengh nungzhoh laisou.

(Liuz Gez)

● Geij bi neix daeu, Luzcai Yen Cunghdu Cin haenqrengz hwngfat gij canjnieb lijyouz yawjgonz va'ngaex, youq Dacau Cunh hwnjguh dieggoek ndaem cien moux va'ngaex, coih daiz yawj gingj, aen vwnzva'gvanj dajndaem, daizheiq daengj giekdaj sezsih, hai ranzdozninz caeuq nungzgyahloz, aeu aenmbanj guh baenz diegguhyiengh nungzyez youqndwi miz daegsaek, yinx ndaej bouxhek daeu youz yawj va'ngaex, daiq vunzlai baenz miz, saedyienh vut gungz.

(Vangz Yaubangh)

● Mboengqneix, Hozciz Si Yizcouh Gih youq Bwzyaz Yauzcuz Yangh Whwngz Cunh Mbanj-whwngz banh ciengz yienj heiq vwnzva banggungz leih lwgminz, ciengz heiq neix cawjdaez dwg "gyaez dangj gyaez guek vaiq vut gungz". Yienjok hozdung yungh gij hingzsi "yienjheiq cezmu+camdap gij cihsiz cwngcwz banggungz". Neiyungz lai yienh, yinx ndaej haujlai vunz bae yawj.

(Veiz Yenmingz)

● Geij bi neix daeu, Cenzcouh Yen youq mwh vut gungz gunggeng doenggvaq ndaem makit daiqdoengh lajmbanj lijyouz, hawj suen makit bienqbaenz dieggingj, gij canjnieb makit baenz gij canjnieb ndei dangdieg ragdoengh nungzyez ginghci hwngfat, baujcaeng vunzguhnaz laebdaeb laisou.

(Vangz Swhcang)